

萬善花室文藁

原序

余未嘗爲駢儷之學顧於其源流派別嘗攷核之矣往者喜楊蓉裳農部芳燦之文也蓉裳之言曰吾之爲儷體文色不欲其炫音不欲其諧以閤采而得古錦之觀以閤響而得孤絃之韻是則吾之所取於玉溪生也蓋本朝之爲駢儷文者無慮十數家而討論之精則後來者往往軼出前人以上若蓉裳之文取格近於邵叔以孔塈軒而易其樸而爲華取材富於陳其年吳園次而易其熟而爲澀其於此事信可謂三折肱焉矣彥聞明府往嘗與余唱和詩歌於京師及來爲令於閩而乃知其工駢儷文昨自福

州郵以示余其命意遣詞浩乎若靡有津涯蓋與蓉裳有異曲而同工者蓉裳固彥聞之受業師也蓉裳爲人樸誠若不見其才之能有爲而其爲伏羌令嘗著戡亂之功人謂民感蓉裳之誠故潛以賊謀之謀告而蓉裳得擒之以守城而定亂也然蓉裳絕口不自言上官亦未有舉其功而特擢之者今閩中無亂民而其俗之凋敝甚矣舞文抵法者接踵而興閩縣爲赤緊而其俗之敝自若也上官咸知彥聞之才故自永定調取以治首邑彥聞發揮儒術當必有異乎俗吏之所爲者行見膺不次之擢其過合逾於蓉裳矣歐陽子曰文章止以潤身政事可以及物余故序

彥聞之文而舉誠能動物之旨以爲彥聞必能深究乎誠
求保赤之學也道光十一年春仲新城陳用光序

敘錄

萬善花室文藁七卷 國朝方履錢撰履錢字彥聞大興人高祖辰就婚常州徐氏卜居陽湖故彥聞自號江左僑民中嘉慶二十三年舉人官終福建閩縣知縣彥聞博學嗜古自天文地理氏族金石錢幣及六書九章之法梵筭之典靡不綜貫年十三爲文示楊蓉裳芳燦楊驚爲奇才長與李申耆陸祁生董方立吳山子輩以文字相切劘故其派別明而源流正淵懿樸茂舉齊梁以下浮靡腐熟之習力矯而廓清之乾嘉間陽湖工偶體文者以洪稚存孫淵如趙味辛劉芙初爲最彥聞與董子詵董方立兄弟聯

鑣繼起以稱雄於世所謂屈平宋玉導清源於前賈誼相如踵芳塵於後者也陳恭甫編修稱其文匯漢魏晉宋作者之風骨神韻纏纏焉御風而行而陽開陰闔雲謁波詭神明矩矱動與古會唐宋以來迄明一人而已誠知言哉彥聞又有詩集五卷詞集二卷富蘅齋碑目六卷伊闕訪碑錄三卷希姓錄一卷泉譜一卷皆爲當世所重光緒乙亥其孫恮與余同居保定之蓮池索全書不可得僅獲其文彙七卷是編乃永定人士思其政績而刻以誌愛者板甫成卽燬於賊故集中譌奪處多未及更定而前後排纂亦無倫次王君文泉重爲鋟板與同人核勘稍訂其譌至

編次因無定本可據姑仍其舊世之讀是編者庶沿流溯源知所宗向不至染髭鬚而輕前輩易刀圭以誤後生如曾賓谷之所深譏也新城王樹枏

萬善花室文彙目錄

卷一

擬嵇叔夜琴賦并序

擬江淹江上之山賦

擬庾信蕩子賦

網山賦并序

傷友人賦并序

飛蛾賦

簞賦并序

小山招隱圖賦并序

金近園供石圖賦并序

別知己賦并序

神樹賦并序

感役賦

蔡浣霞太守煙雨倚樓圖賦并序

玉鸚鵡杯賦并序

倉山月話圖賦

古藤賦并序

卷二

懷遠縣重修塗山大禹廟碑

萬壽恭頌

謹序

萬壽頌

謹序

贈陳丹崖序

答董方立書

再答董方立書

與方立論古泉書

仙山塵夢圖序

卷三

春暮遊陶園序

周伯恬詩集序

問潘念謨疾啟

潘念謨誄

并序

送趙林一序

江行記

與江神牋

祭莊印山夫子文

祭周劉雲文

并序

書劉芙初編修駢體文集序

送董晉卿南歸詩序

誥授朝議大夫甘肅鞏昌府知府護理鞏秦階道胡息齋

先生別傳

沈貞婦繪古圖贊

并序

答劉青園書

綠玉詞序

郭烈婦傳

王君貽珠香雪圖序

立魚峰贊

并序

宋母曹太宜人墓表

葉鶴巢越雪集詩序

越西江行竹枝詞序

卷四

歐陽文忠公畫像贊并序

游菊江亭記

陸祁生宣南話舊圖序

陸母林太孺人家傳

清歡堂詩集序

祭董母莊太宜人文

懷知圖序

徐仲平原學六篇序

汪母董孺人靈表

祭亡友文

并序

李氏三忠家廟碑銘

趙收菴先生二學圖記

清故江西廣信府知府

誥贈朝議大夫兵部車駕司郎

中 晉贈振威將軍兵部侍郎兼都察院右副都御史

安徽巡撫兼提督軍務康公神道碑

黃氏恩圃記

答陳伯游書

卷五

鄧完白先生墓表

鄧氏隸書贊

并序

康蘭皋侍郎行年圖序

刑部主事康君妻王宜人墓表

與李申耆書

榕陰消夏圖贊

并序

贈李靜菴序

嵩山啟母廟碑

董方立誄

并序

蘭石齋駢體文遺藁序

小琅玕館雅集詩序

答吳巢松督學少司成書

和簡勤公讀易匯參序

卷六

東流縣志敘錄

河內縣志敘傳

武陟縣志敘錄

謁紫虛元君文

瑞麥頌

并序

天甯寺重修九蓮閣記

呂子楸誄

并序

史孝子贊

并序

許烈婦贊

并序

重刊法苑珠林序

東湖縣知縣洪祐甫碑

卷七

龍母廟碑

周劉雲墓表

董大令

敏善

黎陽城守記

鄧漢中德政錄跋

莫愁湖秋泛圖記

鶴樓雅集圖記

趙甌北先生重赴鹿鳴圖序

孫母倪孺人墓誌銘

潼陽唱和詩序

爲金近園與朝鮮駙馬洪約軒書

爲金近園答朝鮮進士尹玉壺書

代胡素亭謝朝鮮進士方暉齋惠藥啟

袁蘭村詠詞

并序

宮保尙書制府孫公錫壽恩榮記

萬善花室文藁目錄終

萬善花室文藁卷一

畿輔叢書三編

大興方履錢

擬嵇叔夜琴賦

并序

嵇中散負名世之才而生逢不淑天下無主終隱其身棄
絕當代一人睚眦竟以讒死可謂傷矣孫登誠其性烈作
書自言輕肆意者神龍蟄不求信而其天矯之性終未易
使湮沒也夫鐵以剛折百鍊則爲繞指柔鍛之爲好殆有
深蘊乎其生平著述文章意皆本此至於琴賦則尤擇其
至純去急微焦殺之音而壹以和平之聽稍汎濫於奇詭
卽引而歸於正盡琴之理抒己之德所謂文與道合者矣

余闇於音律兼拙詞賦而有志於古聊擬其體未能揆夫形似細已謬於毫釐宜其陋也辭曰

美奇槿之挺英兮薈精蕤於龍門蔚昊極之中潤兮稟坤靈之至純若木蔭於垂榦兮金波藹其輪囷臨儕枝而高峙兮渺藎育而難鄰止鳴鸛於晨風兮舞威鳳於夕春沃流景以終古兮非斧斨之可循且其形勢則仰託於山倪峙於淵駛駸罷陀翹翹嫵媚峰蟠塊北霞頰蜿蜒丹苔虬根紫芝絡顛嶂劈削以頽鳥石崩劣以幻天東走崑崙浴乎鬼室鬱羣嶂而靈据流九宇而奇穴風夙靡以摧霄雲晝昧以失日容成莫運其樞兮輸石不能注其鎖若乃奔

泉迴湧將將漾漾湖渚滌潤拔擢混漾圓潰瀑而若珪周
圓潏而成嶂鵬溟卻滌滄嶼礧浪川平神秀津疊聲宕驚
潭窟而不前搏扶桑而直上縈繚徐折淩涯遠收夔跂下
構靈胥上儔鏡溶欲抱翠瀾獨浮萃華蓄珍贖耳眩眸懸
黎垂棘土輝澤媚三色七采竭用而不置椒茝爲之茵櫨
檀爲之僕珊瑚爲之墀火齊爲之燭膏露之所浸淫彤雲
之所霽郁列眞之所浮游龍鱗之所遊伏猿嘯影而忘哀
鸞唳羣而歸宿蓋亦攬八極之曠朗冠千載之祥淑神麗
於是乎偉兆休徵於是乎酬酢矣乃有志德上士抱道逸
民登天台而恨隘入峨嵋而厭陳相與披榛莽闢邳垠載

愚公之畚役五丁之斲奄息舒節以憩乎名山之巔湍池之濱遐睎巨阜近瞰容溪疏煩想於弗鬱招幽慮於離囂拍洪崖而相矚揖松喬而下之緬孫登之至音遏素女於太清嗥獮父之噉噉引頻伽以嬰嬰旣調曲以赴節集衆響而衡平感妙桐之逸格晃天籟之寄情乃扣玉膚順瓊蒂攀柯爲階斲材爲翳因制爲琴思有默契剗厠始就雕琢仍加而其洪纖掩其陋瑕計四時以爲修廣六藝而不奢前巨後狹象乎尊卑之度上圓下方承乎天地之數澤潤而敷中虛而注經以文絃緯以冰箬持正而掎不失晷步其軌審也精黝紋緻迥映流黃脂柔密凝繪繡微揚錯

華玉以爲枕駢瑤藥以爲牀砌池平以象貝編微繩以夜
光發彩陸離輝乎四方其飾麗也乃其發聲則按指各情
並而不淆軒輊雜流悠促孔昭輕攏慢撚心治手調闔解
漏越撥刺柱撓始布器而命引已人近而意遙至於宮商
旣諧角徵協韻瓠巴安操師襄理素初雍容以神暇繼溫
噦而氣奮冽飄眇於沈思返紛糅於廣運攄醴醴其嘈噴
騁燒燒其振迅碧霞散彩白雪斂寒風霏天外雲生袖端
驅拂興忽動聞潺湲流水無垠峻崖攷觀條躬齋省蕩志
甯宅樞衣入戶解襪登席進御主人退揖嘉客囊檢徐紆
飄埃緩掖詢恬淡之素質非玩好之餘癖若夫峩峩層構

岌岌飛棟綠菱懸插絳英橫控金闕華開銀河星動簫管
謝闌金石罷弄鏗然獨奏潛弛陰縱則有元鶴二八集於
廊門郢中猗蘭海上陽春尼山思歸姬旦感親飢囉熙泰
綏肆洞神彈越弱腕歌激皓脣歌曰洞庭張兮夕暉渡引
仙舟兮千里去憩蓬萊兮雜佩陳冷煙島兮要美人怨年
華兮惜朝槿醢朱顏兮嬌采蘋贊舞操以自廣兮夫何恨
乎鴻鈞新聲向畢授節亦舒奠衍異態紛爲疾徐驟抑按
以藏摧遂淋慄而斷續或急擊參差奔放躑躅叢談禁吐
蹀躞遑囑或聯縣長往銜命不復鵠噉竟空雞號終宿或
清壯激曜震驚百里少卿一呼創痛皆起燕客赴秦蕭蕭

易水或婉約平喁綢繆告語落花隨人亂鶯無主詩諷諭
而不傷騷反復而不怒遂乃馭沓並興翩翹眾舉適慘亮
而礪駭忽充屈而猗靡婉嬋娟而俱赴倏蹉跎而背馳沛
匄磕而迭遇猥搖演而失岐或略驛其拔擢或殊奔而絕
羈磅礴嚙霏浮拍旖旎唧嘈瞪曹馘汨趨熾烈聲競剖短
韻委蛇悵鼻而不容隙瓌豔而不可知然皆不縮不盈度
中模楷紆餘煒澤彬蔚揮灑扣幽阻而平朗抑繚糾而神
解或散繁植業抗世希美姿妍麗以都雅體溫潤以流綺
效明誠以齊欲慨垢滓以裨理斐靜擇宜規荆倍蕤安徹
駘蕩從容闢邇拔拭拒擗擗排擠共驚而挹殊特而峙

餘音參出浮彈未已燦若連珠升雲中端若旒旒朝辟雍
熙若芙蕖揚葩而爭灼乎南風緯孔昊之載儀希虞韶之
足崇軌道真之寂寥吾亦養夫吾躬爾乃春郊遍淑芳草
被隄幽蘭緝帶新楊染綈巡迴曲水偃息城西妾魚鱗重
乳燕翅低順蒼穹之造育鼓羣蟄之積迷整逸響以遐布
佐化功於重黎至夫月皎上宮露盥瓊閣羅圍結麝綵帳
暉雀乃宣正情防極樂譜懷陵轉清角吸諠譁於再輓延
素隱於大漠懸條利於罕觀受滋融而有綽若其名則池
上爲平濱下爲詳號鐘繞梁焦尾鳳皇聲出清和則言暢
以自廣樂象憂怫則命操以善藏其爲曲也騶虞鵲巢白

駒伐檀龜山越裳貞女水仙風遠入松石近飛泉別有楚
妃九引雜歌河間胡笳白魚筌篲離鸞錯落掩映翻後迭
先貫序所推務乎聖賢是故宓義俯天察人而琴生其端
少昊繼之禁邪促煩唐帝雅法重華擴延文王賦美大武
益絃微子思懟於殷宗孔父道厄於魯年莫不攘指發弄
奕奕淵淵然而仁不足化八絃者無以渥其惠裕之治智
不足格萬類者無以應其溫直之志武不足扞四國者無
以浚其慷慨之氣信不足傾一諾者無以察其貞介之誼
也擬箭籥而騁越懲笙簧而淳懿聆斧藻其至德襲琢磨
之令器可謂應感隨會通塞因紀者矣追哀激之音則雖

忤愉者聞之莫不百感悽惻漫泣橫臆齋志默悼斷腸蕭瑟岩嘽喈之奏則雖戚思者聞之莫不謳舞康衢展懷自克踴躍跳跄忘化顏色綜條達之聽則貪戾者聞之莫不竄其強慝究清厲之引則懈懦者聞之莫不勉於峻刻於是成連輟於海表子春鳴於空巒師文注耳而不寐鍾期傾心而洽觀趙定蔭思於修竹龍德奮志於皋蘭絳駒舌結泰容吟喪駟馬仰秣游魚疊浪落霞拊耳而神女翔清微觸視而天駿望屏寒暑於已披羅律呂而盡邕詢可以窮義知化備德體道壹性贊情先識彌照管生抱璞而頤慮楚老含貞而坐嘯徒風俗於漸浸叅日月於並耀豈獨

媿鰭鰈與圭璋徒襄飾夫形貌殆音聲之超極爲君子之
貴操辭曰琴德徂長樂之興兮雅詩三章孰侮余兮登於
瑯環錫玉書兮廣陵久散曠泰初兮叅譚樞機識者疏兮
運於微茫抱六虛兮

擬江淹江上之山賦

驚瀧無前兮帶荆門而襟越千步一山兮走斷山以爲骨
嵯峨兮衡參恂恍兮勃舉疊嶂兮轉壑挂屏兮立笏通四
溟之地肺起九疑之靈窟削錦麟以承基挽玉龍而伏闕
爾其碧潯東下晴江萬里仁萍實於前洲垂丹草於中沚
迴濤迫以蛟眠怒峰矗以鵠峙石望夫而舒頸巖留仙而
啟齒悅鳥性以忘憂眺花城之合藥宅千載而無薶鎮百
川而如砥惟靜言之契陪感蹊徑之莫同懃當階而已蹴
棘被道而滋豐悼人生之常歷致流蕩於厥躬情婁媽而
方已意翕施而若蒙偉哲人之才力欽顯允之化功呼六

合之廣周納一息之穹隆仰濯枝而垂露豈隕籀之從風
伊撫志而自嗟應羣物而屢殆伏虛檻以招雲謝游簪之
在海傷蛾眉之孰珍望玉階而誰待吟梁甫而和予舞清
商而旣悔不若整桂橈與菱裳兮刈晚區之芳茝獨登江
皋之斷山兮揖靈修之異彩固陋質之駸駸尙企爾音於
荃宰亂曰夕陽之疏兮懷江南層嶺溢目兮思之覃安能
驅此逝流兮嗟孤衷之俯採

擬庾信蕩子賦

蕩子去國年復年孤征風雨黃河邊
游塵逐暗月淒聲隨曉煙若夫寒
閨春晚遠地秋多雙砧難節單笳
未和鶴操離曲雉識悲歌銀繩竹
箭金的銅荷長樂不樂莫愁易愁
舊粧素鬢新吟白頭夢迎薰帶魂
去蘭舟絲絲怨骨昔昔泣眸去日
應無遙恨生那知期短復吞聲化
石羞餘萼迴波卻染形落花開匳
一寸雨飛絮著牀三日晴昨得河
中尺鯉書漢南歸信今非虛且展
芙蓉匣先籠翡翠襦宿鬟加意整
歡顏不覺舒相逢驚瘦影偕道往
時殊

網山賦 并序

夫昧泉之扃不能以陽燧燭者真宅之闕蘊也穹谷之杳不能以崇墉掩者坤靈之毓采也故隨堵駢羅名佚其五蓬萊嶙峋迹外乎九有熊之偉通夢域於華胥夸蛾之精運王屋於海尾是知幽峽者非人力所營而人能達之冥搜者非神功所助而神亦啟之蓋玉堂石室之華珮岑珠岫之奇五丁興千夫爭勞巨鼃與羸庶比烈矣柳城縣東南五里有網山者亦遐區之異岑也涉巔有荆榛之阻撫踵有虺螫之虞訕訕澗澗厯百紀千隱隱沈沈莫之或覩邑士某者緣山爲宅夜分而寐爽與神遇命其鑿九泥豁

層岫勤而不屈維余能佐某卽信之逝告鄉閭斂錢命眾
具肴施餼曾未浹旬旬然遂闢石穴倒峙益若覆羅溫泉
環咽斜以徑腹雲骨霞慙剔鏤識其仙才金液瑤漿呼吸
通其靈氣倬詭旣見四方奔走飾瞿曇於竇陰假纓絡於
叢溜懸穿旁達嵒嶙纏連有條不紊若網在綱指象攷名
命曰網山時實嘉慶十五年庚午之秋也逾三載大人牧
於茲土僕自京師來趨定省覽南極之川原問朱垠之坻
嶢躔步中皋款睇勝域會得茲麓心焉賞之港洞上隙瀑
乳下垂坦慮忘遐鉤奇選儔列祠藉卉留連終暑鄉先生
何君潛溪揚解於前曰逸躅臨而翠微悅高蹤邁而芳杜

恥不獨聳流覽之娛耀棲遲之美也將使桂壁受榮於嘉
藻丹邱標目於君子今山之始翕終明久鋼乍披波涌鏡
吐曾不幾時而吾子振綺靈蛇之珠奮璫雕龍之彩涉湘
度嶠惠然戾止豈蠹蠹者有所翹與或磴磴而展其儀騁
妍寫妙請子賦之乃爲之賦曰

迪余懷之銳發兮薄九臯而迴翔縹聞風於中區兮跂崑
崙而稅華陽驚桂軫以探疑兮夕余濟乎江湘琨阜縣而
宮別兮哀芝田與蘭唐蒼山之陰象林之左丹水出其磧
火井煖其燥野莽貫而無垠兮塍瀾迤而弗脛洵乾川之
秘壤兮超紆譎之塵瑣爰有山焉隱魄榮威諡祥靈祇頌

職萃夔爾其山之爲狀則嶄巖鬼魄駸駸盤紆匿穎蔽珍
環落密塗鼓崆峒而連卷兮鞠嶢巖而灌輪鬱律隆崛以
自峻兮徑輪廣袤澶以岳巖肆翼翼之高下兮允京峙於
炎隅原隰衍於陸海兮參紛互以交錯秀禾平碧億頃兮
亡屑塵之潛躍蹇朝步以駘蕩兮亘望蒼岑而眇薄忽背
隴而徐頻兮靈關覲首而閤廓迺亟趨以愉意兮驚囊觀
之仍橐咨山闡之哈我兮循沓嶂以審夫重鑰蓋自遙自
邇一直一枉時尙奄息而未轅兮徒徙倚而恹恍孰鴻構
此絕游兮亦奚疑夫山之網也於是倒廡空濱啓窟拂翠
羽披石髮劉鑿滅痕漱蕩騰沫雪然颯怒對然雲凸排晻

慢之森森兮迫寥寂而屢蹶天扉呀以隆闢兮鬼脇貫以
迷真庠窈巧老其相轆轤兮鎗鈇裂而爲皴礫百笏以玲
瓏而上達兮燿寸銖以纏積而修綸左右覩以驟轉兮惚
不察其逡巡爾乃擧其領緒揆其端倪袂藉級而曲引兮
檻登蹠而獨躋則有飛蚪停鳳偃仰而爭睨泐菡萏之精
英兮石瀑崑淪而戢丹萸佳乳馥馥以垂注兮寫吐氛之
虹霓溜倒茄之滲漉兮若瓊柯彫錯以瑩乎初日之梯路
不周以彌涉兮又踟蹰攢仄而植宇度徑庭之倏延兮夢
闕闕其承附彼椒豕之萬仞兮陽離胡所施其嫗煦神樞
運於太虛兮

三句用韻

嚶涌凌出乎巖竇泄元關而叩紫府曰母蒞

其貞明兮素娥嗣其光晷火齊墜於朴歸兮覆孟脫而不
盈咫尺朝既炯晃於珩壁兮暮方激射於璣藥羌誰悟此胚
渾兮葍閭闔而攬儒侂鳴籟緣雷而振宕兮雄風四戰於
屹嶠之尾泗磬浮以琤琮兮球鐘合以鋌鉦水龍婉以答
響兮春鶯翽以諧音繼復蕭騷映盼而相失兮硤硤礚礚
鎬以長吟淪呀汨漚軋以旁嘶兮疾霆破鎗於窮陰使不
難者將震而柱礪兮遑論夫惴慄恐懼者之譎膽而賊心
覃桐柏之眞館兮挹八玉而御五煙躡安期之赤舄兮禁
秦皇之玳鞭神人舉影鉅鹿兮玉女散轡於天淵儲沆漭
之英兮產芝髓之妍夕盱雲韶之樂兮晨誦奏夫靈文之

篇瑱琤璫璨其佩綬兮續紛駱驛其輜輶咸叢集於厓隙
兮疏煩想以錄冥筮巨靈自赧其臆掌兮肩吾曾不得儼
其精研嘻蓋藏之已駿兮倣能醅粹卓犖而蔑先也當春
則巔旭祛寒巖和散滯雜花曼鮮芳草羣砌爛乎若虀錦
費續駕飛梁於霄際時禽習習而將翱螫獸颺颺而奔蹇
洊雷假道於岐達豐隆孕形於林裔故能茁膚寸澤嘉穠
浹春霖之蒞敷兮錫沛然之休瑞入夏則龍掇森鬱檀藥
淋瀝濃翠璘璫皎色炫晃如湯之沸所弗臨赫曦之焰莫
能往迺藏夫初皇之雪循蜚之冰嘯寒而淪凍兮氣淒清
而曠朗塵泆浹於炎寰兮被燠煖於裸壤香雨滴漉於枝

蔭兮泱流噴吐而成響暨秋則絳蜺半捲赤苔始衣勁鶴
止其峒宿雁巢其岬調珠露兮桂爲帳揚野馬兮蘭之帷
肅其次寥汜豔兮羈客臨眺而思歸列子御風泠泠兮武
夷張樂而停騑斂皓魄於岵隙兮鏡圓靈於峰圍朔管引
而月小兮江笳逝而山悲徂冬則簡積潁砑澹淡峭嶸愔
愔壓翳默默含宏地脈蒸而難涸兮雖嚴節其莫甯冲暖
而乘躔兮怙統類於元英弱薦聶炕於凋候兮蠕蟲噪嘒
於素商實噤閉之窈窕兮疑重瘖之在空幕溫暉於慘黷
兮緇凝晦之霰羹瀏颯繁韻密率而竄赦兮答子律於黃
鍾至若淨衆朝宗清瀆迴瀾雙帶盤盪四絡鉤聯左瀟沅

右邕川前融江後牂牁懷赤泉揭丹淵濇澗瀾淪迅復增
澆亢溜懸制於其竇蹊舜浴之處不庭兮妃帝臺之砌高
前趨瀟瀟以瀉瀉而各砦宕兮沸表坂以濯垓埏黃甲紫
鱗馳波而跳浪兮白荇青藻輶以洞沿俱經乎隘陜之口
詣乎蹄涔之間其木則有條有梅有棗有楊榆桃榿梧檟
檟柜柳楚荆牡荆女桑栳桑樸檉丈尋條肄合抱松有上
古之槎柏有千歲之葆桂厯序而榮英相連理而獻藻沙
杉散楸楓椰枳聊大榕之蔭巷藹於嶠扶疏瑰奇百狀千
名菱薺攢柯菸邑擎莖重明上罇狂飈自生抗葉敲枒短
琤碎瓊藥藥仟仟靡晷克甯其下乃有麝鼯鸕鷀孤鸞迅

雖角端獬胡狻貐壘獬熊笑人面猿引仙臂峒象晦奔蠻
馬晝睡猩猩之侶費費之倫雨散風歧冤伏陵寤髮髯驚
跣疑有缺文又有獠目元狐魃猿素狙踐影噪踪善疑易怪覲山之

貌擬置擬罟若將鼎鑪而儲束焉莫不跼蹐踣蹙魂滯氣
懾於洞外其上乃有文鶉彩鵲獨鶴羈鷁城旦倒懸桑扈
竊脂孔雀珍氍紛縈斐尾翾翾歧歧碩於斯者禕鑠尤侈
自邕來翔越人呼之名曰鳳凰鳩婦翼頰鸚母鬢霜呃喔
構厦離縱成行望帝之身咽血哀鳴使人回閭悽愴怨游
而神傷其草則靡蕪杜蘅王芻菴韭涂列虎杖莽曰馬帚
都管六葉銅鼓單拇蓬茸薤蔓蔞蔞薺剖夏翼冬荷晨刈

午部曜日熙天不可指扣其上乃有班班雉奴雒棘竄蘆
啄飲半夏爰惟鷓鴣蜻蛚晚唳蜩蟬夙喁其下乃爲蚋螻
之邑蛇蝮之都修虺碩腹異慕方顙水蠱爲蝮天螻爲蛄
橫睛怒喙聳耳鑿齟射工蝥賊吞旅士而膳室徒螻螻蜿
蜿甘我肌膚其果則龍眼益智若榴丹荔柑柚橙橘種以
十計烏欖茗泛檳榔鹽漬蓬萊仙棗藥曰如何栗房蕉實
棠藜密羅黎朦櫓罽人面羊桃土品莫測峒名殊科鐸甘
阻芳丕繁且多若乃丹砂紫芝黃連青乳款冬決明桔梗
益母薏苡比穀荳蔻設脯蚘蛇之膽可敵楯弩凡俞跗之
所稽桐雷之所譜蓋已拔一報九擿十得五其石則砥砭

琅玕嘉氣穹窿皴栗磅礴表樸中金瀨延曜飛仙憩空
似承露盤續幻芙蓉片片礪齒星星照容其竹則班厯暈
螺篴筴琢漆篴簞可箭篠籀中筆歲雨苞籜月百挺節聽
鳳餘紺化虵猶碧嶰谷無以詳伶倫安所識徒觀其動植
之萃奧寶藏之精絢幹質之潤黠奇羸之仍荐如毳如絲
如霏如霰綵緻爛朗赭熾遷變天府之秘璇宮之選竭巧
詰奇於此乃見所以煥炳日南作鎮朱縣也舉衡之右故
號靈巖者則有龍隱棲霞雉巖立魚劉仙屏風曾公讀書
皆以玉筍瑤簫峭立林豎高直化城下竟水府貿其餘勇
勒其參伍以角力而門麗莫不拱雄剡羞坯土逼者戴望

者俛昔以命服未之該周譚未之名葛洪屈而不爲標柳
生守而不能銘屏悠視遁荒裳蹇踞落拓蔑陳乎海圖虞
經徒使俚獮曳腕而登涉獐獐缺舌而肆評山祇享貼鄴
之祭澤圉聆踏搖之聲則閭秀後於媯補託基邊乎亥祿
之因也使溯厯以先之則廣成不棲崆峒而黃帝將駕航
於灕水焉王母不築崑崙而穆王將脫驂於湘涘焉孫登
去蘇門而訪幽園公避商雒而結軌矣若是之虧替漏渫
者吾固不悵山之虺頽而深悲九京之難起也然而屯於
泰始蒙於嬗載啟賸展闕惟我

清代璣祥顯符臻典懿會蓋

天子纂神嗣聖洽和永泰羣時受釐膺靈致禱德翔樂祇
沛乎無外鵝林鰈海輸琛納貝是以社斗凝其暉憬維幹
其真粹精極崇貫珮雕珉嶢岼海汜爲岱遠臣攄頸延其
臂蕭兮將配藜於蒸薪字嘉禾與黃龍兮藪奇木與白麟
至於蒲塞持教大乘談果借拯溺於無生兮秉慈航之慧
鎖緝名鷺以飛鉢兮悅禪前之宴坐徒巢卉以藉樹兮剎
陰日而宅火謂列岫之森聳兮咸爲擁錫而豁開彼羈氓
之欽述兮非信心之在我若乃君乎牧乎是耶非耶馨誘
阜蘭顏若茗華闢山之客假夢而夸誑彼煩煩斐爾葺加
昭光振智勅出金沙越土感之勤薄勳奢詭兆或允詮理

其瑕太人司占敢告無譁於是輦六氣兮游無窮思遠託
兮憺忘歸拂霄愕兮誰與期良醴醑兮荃獨來揖靈僑兮
揮羨門過金女兮卻宓妃陘爲闔兮窺爲圃芝爲殽兮瓊
爲酎誓解纓兮登帝鄉暢隩區兮仙世宙亂曰馮隆之宰
宸特鑒兮朏昕而寤列宿揆兮忍俊蒙昔產漱灑兮運裏
淳按照在原兮崇島織路舞蹲蹲兮神之汜汜舫南健兮
有卷者阿嶽外垣兮兀婁狻疑剗精魄兮葢葢無厓永無
極兮

傷友人賦 并序

僕所友善者有馮志高其人焉野王序裔敬通啟胄高華
摘雲朗抱襲月故國千里賃伯鸞之春燕臺十年投定遠
之筆饑迫欲死神頽瘠生孔文舉云憂能傷人殆斯謂矣
彼穹匪忱景命徂謝幽局長寂歸輒未期卷施之心已抽
萱草之望誰慰况復弟非曩首門戶何寄婦許秦嘉婚禮
未迫孤館無可通之夢荒亭有未招之魂傷心之事更何
可言昔安仁之於楊仲爲賦懷舊文通之念殺孚彌悲知
已僕旣惜朝露未感宿草因作斯賦以紀哀云

晨風侵骨悲條鬱林北陸思渺南鴻響沈託吾友之毀芳

萬善花室文藁卷一

七

悼遙緒於素心惟此良友鏡華毓萃容與典籍迴拔儕類
彥輔謝荷叔寶慙穢志茂鳳翼過蹶驥步弱去庭闈遠辱
親故京國羈人燕雲歸路惟疇年之舉且余過歸於帝邦
乃投袂以結言抗執手而不忘眷棲息於一室結縉繆於
異鄉協旅思之不寐起中夜以彷徨天高月白夜寒燈侵
長缺氣冷短歌聲瘖感北風之惆悵跂東國之徂深解久
期兮紫玉佩泣橫涕兮丹羅衿余淩岫兮言旋爾絆止兮
將別策邊草以促征賦停雲於廣夕誓明河之躑躅怨星
車之參差勵明德以共勤申麗翰以要之何生平之暫睽
乃幽明之永岐刈蕙若之春英斷瓊芝之淺蒂嗟銑采而

未發嘆瑤光而終闕彼泉室兮
縣味屏斯人之偉器肆求
形於宵夢若登叫於帝閭叩
九重而不納遺一世其若塵
顧沴氣之遽結遂芳菲之不可因

飛蛾賦

繁蠅化之繁類乘薰節以遊邀暫伏影於永晝乍騰翅於
初宵羣棲擇之無所萃鬱蒸之相招望依依而靡向趨焰
焰以自焦華繁兮舒烈百枝兮豔室炤爛兮灝灝赫戲兮
奔逸挂銅荷兮輝映空蓮帳兮彩密引微軀以何從轉橫
芒而愈逼祇蔽曜以有途雖隕身而不惜嗟人生之窮昧
狎造物爲可持臨義壑而遠畏縱利焰而瘁思偉碩人之
致命蹈鼎鑊而無辭非悼傷於才力羣申申以詈之何茲
蟲之委瑣甘投體以抱緒誠自晦於機穽亦失炫於媚嫵
辱君子之明光意榮藹而難主狀馳直以好修遂迴旋以

懸炬豈赴脂之近榮已斂明而齎怒愧剛克之素蒙感隱
憂之終頻彼夫胡蟬之微翼方息情於晨風蜉蝣之陋采
亦停質以逞雄皆默生以悠悠哂驅向之異同懷平原兮
吾有思撫玉玦兮大道中孰矯勇之敢隨吾亦鑒乎吾躬

簞賦 并序

物之美於夏者莫如簞焉動不易時處不違用雜彩在室
泓然來涼意之所暱感而賦之

萃北陰之崎曲裁千尺之篋管艷寒威於虬枝吟商岫於
琳琅惟擷翠而成縷集羣材而流黃抱浮雲之迢遙奉明
塵於往夕貴設施之異宜展霜華之凝帟仰左右之薰儀
慙丹艸之顏色於是沈陽沸烈溫風溽溽綺疏斂彩璣帷
欲燼顧遽苗之是衡乃絢練而厲情藻披素而自悅氣滋
紅而爲馨仁炎洲之如砥豈熙澤之可縈非氤氲之敢違
固杼柚之含貞潤嬋娟之蕭條駛餘陰於屏几寧容與以

相從撫波文而無已廁美人之前席託玩賞於足恃祛鬱
氛於一朝荐流颺於千里佩德音之纒縣甯獻媚於芬華
效六尺而忘感指三秋而有涯甘韜筒以秘彩雖捐置而
無嗟揚纖埃兮終潔怒卷舒以意遐重曰攀幽蓀兮淥水
潄拂微瀾兮披子衿幸芳臭之同倚兮時永愜乎素心

小山招隱圖賦并序

董子晉卿作小山招隱圖其族子子說賦之意有未盡復命余廣其言乃爲之賦曰

伊穹隆之莫接固參差而誰修
遭薜荔兮河廣續荃枝兮
道周奉蹇媒以自容羌欲達而夷
猶金峯遼兮碧湍曲陽
林旋兮蕙櫨促騁彤雲而神變
斐長風而霽郁山靈旣其
連蜷兮漱華池於心目於是斜飆
迴拂遺塵汨前翔兮淺
淺渺兮翩翩蕩榮趾於隄末沈此
心於流泉曾巒壑之可
循孰慕悅之足先魂恫邑而太息
兮舉靈修而未悔捐余
玦以紉秀兮夫亦知其甄采怨盛
年之隄側隱思君而魂

礫懼鳩飛之爲媒又衆芳之將怠望夫君兮誰思揖中洲
以來歸悲落葉以沒躋遵霜露以爲期步絲緒而惜戚寒
淒淒其幾時挽同心於千里兮雖僂俛而奚辭歌曰棲九
疑兮狢夜寒撫雲車兮湘之端倚樽酒而延伫心怵怵兮
未敢言進軫琴以歡御橫玉瑟以炤座列幽馨以相通庶
佳人之予和覽轡並節兮報菲芬以忘痺重曰踐石室兮
天有涯實寸憂兮重咨嗟甯抗袖而悵望結桂枝以意遐
瞻白日之代序抱黯黯於芳華

金近園供石圖賦

并序

海東之國朝鮮其最先者也操疇陳範基於父師効贊納
忱纂爲外服梯山航海秉朔獻琛歸我

聖朝百七十載史不絕紀歲無踰賓故使者之來亦喜與
大邦之賢士大夫遊從爲樂宏其志覽而金君近園藉裊
胃之華茂瑚連之器逸躅抗雲飛譽嶠雪執當時之觴翰
識彼都之价臣與朝鮮侍郎申紫霞有瓊李之貽僑札之
好焉申君旣歸其門人李子絳茶聆而慕之神期若一蓑
葭有思賞契所欽蘭桂自郁乃折訊走幣因申君達於近
園遐方之珍先之以峻石一區徑不盈咫圍可窮握靈寶

千黍寒暉百尋清流自引巔非潮而亦生紅芷相縈帶橫
煙而欲滴迢然如雨翳然如霞至其嵯峨翕施若削若貫
眺碧樹於幽城迴丹砂於天半可以知海域奇幻山川瓊
麗之所煥也若夫隱岫斂光複陸俯彩縣縣延延十步九
紆如往而在可以觀荒憬翔和拱挹醲化之餘塏也咏北
風者無攜手之歡懷東人者有介石之誼近園旣感遐侶
彌重他山遂作斯圖而余爲賦以永其意賦曰

紫天爲宇兮流沙之陰掌敷榮之眇曼兮環奇碣之嶽岑
弔海濱而莫返怨天闕之不我臨迺去瀕洞越嶧溪跨金
岫棲玉湍雜雲百億鬱兮盤桓山有華兮石有蕊送君子

兮誓秋水知懷衿之允披沈悲緒之無已苦因風而不前
草蔽月而自舞傷乘桴之孰從魂寂寂而延伫倚修幌之
無極若結紳而欲語矯芳杜之初生兮石能擥而下之惟
廣渚之流連兮恐懸磬之難知媿清佩之如一雖窮陋亦
奚傷沐神交於飛虹習瑤波之末光嗟餘形之遠峙撫貞
介而不忘裁絹素而爲悅貌循覽之在旁豈契闊之敢違
兮汨予心於石梁亂曰蒼蚪鳴兮丹室開青玉爲案兮芙
蓉承杯願使容成駕九螭兮登王母之笙臺終窈窕而不
見兮抱薜雨而下來

別知己賦 并序

余以仲春之月久客思返言從京師歸於南邦良朋密侶
淒別難勝載酒相送匪朝伊夕嗟乎魂靡銷而不長臆初
陳以何已張衡之思今夕兮何夕宋玉之賦非秋而亦秋
雖無蘇李臨觴之怨而有莊惠解帶之忱涼月欲升修日
未落橫咽水於東西緒愁雲於南北曠遠期者人百其感
黯行塵者或二其毛哀樂未迫於中年嗚咽乃生於春半
別之爲累何其永也維時層簾鼓風徑葉晝舞凍梅斲雪
庭花夕陰樽中之醴清濁已分天上之星參商互見況以
恨骨易醉迴腸難吐僕之生斯世者積二十有五年矣毀

齒而爲客卅角而獨行征車聞鐸接夢寐之鑿聲羈舍逢
人驚眉睫之異色蓋有歲以皆別亦無別而不傷嗚呼百
年之期倍此者四繼是言別累之以千鄰笛短而宵漏沈
秦聲低而燕歌壯載攀桃李恐損孝章之年折彼瓊枝欲
問當時之驛若諸君者或以折衝雅範震耀勝流賈生儒
術甲於此朝相如文詞無出其右而辱斯謫劣隨其末光
提攜誨導相與成之金石遜其精堅肺腑亞其儔匹可謂
深矣贈言盈篋不無新製之篇去陌章裳恐墮舊遊之淚
明月在鏡照其清懷停雲藹梁譜此離曲意有未酬乃爲
別知已賦一首聊以謝故人之遐心蕩予思之幽魄云爾

賦曰

伊蒙陋之陳力奉君子之明塵接河漢而輪彩效珪璋而
庇身翳蓬姿之寡植雖夙夜而靡申感清惠之不遐披寥
廓而爲鄰嗟予業之未旣復濡迹以遐邁春陰陰而畏寒
風颼颼而成噫晤牽袂而永思怨投簪之徒隘日追夕兮
何速樽與酒兮助愆惟吾友之遲芳肆令聞於廣居或葆
光於軌躅或振妙於道腴或揮翼而初儀或戢足以自疏
攬靜芬於跬步忘輝映於坐隅彼碩人之相答勗余志之
高騫接寢處之爾遙徵翰墨之我先流晷短而易逝去悰
促而不還懼休德之孰從傷同心而遽捐於是日光紅兮

絳花落鵲宵鳴兮烏入幕滯離樹之千尋指層嶺之百穀
惟初別之俄頃若狂醪之決鬱迨旣別之徂深如疢疾之
煩煥賦驅歌於此際立斯須而何加感知已之繾綣申余
情之芳華贈青棠以蠲忿擲瑤瑟以生嗟驚旅魂之不可
遑兮託軫想於蘼葭

神樹賦 并序

余既有粵征道出皖口以外舅率桐鄉逕道省之淹留挾
旬游覽風物見廨宇之左有樹葱翠鬱鬱高不可狀至其
下則有前人之封護云此樹久歷年所風雨之夜每覩詭
異人或汗之輒得疾患余見其章榦盤柯自拔千仞且生
傍公室無疊巘複嶂之順其宜有桁楊雜穢之迫其性而
能挺然不悴自遠於物亦足嘉也抑豈假人名德有如召
公之甘棠哉或得於天者獨厚而蘊於躬有所珍故若此
其矯矯耶人有請賦之者乃爲之辭曰
嘉植卉之黝黝兮迺託產於官畿何中峙以闡秀兮又抗

莖而成園展不察其初育兮嗟人壽之易違彼振芳而漸
萃兮固榮色之相麗修榦郁以箭蓂兮夸條分而含錯翠
藻扶留以婀娜兮落英蟠纒而綺縟左迴翔於勁飈兮右拱
吐於朝旭緬春翹之能敷兮况秋繁而不索聞獨鵲之哀
號兮覽祥鳥之嬋婉羈雌結而爲宇兮游鴛鴦而旋返上
旣馭莎以受澤兮下亦菴藹而布遠素陰亘於疏途兮斜
標衍於九畹伊茲樹之茂堅兮信有寄於高隅越百尺而
不斂兮中繩墨於公輸庶垣閤之婣轉兮諒斤柯之皆撫
奚復顯其頌頌兮致奔駭於懦徒豈汗漫之風游兮或岐
蟻之所居永言被此異稱兮亦安所保其禎符蓋仰太虛

之扶光兮擅真氣之別茂惟偃蓋之莫移兮聊自解於剝
瘤感生理之終休兮嗟蘊材而希覲近曲庭之相倚兮又
何規遠於瓊岫曰自貴其儀質兮拾雲英而疏霞藥鸞鳳
棲而吟嘯兮願何取乎浮螳恐凡瑣於廡下兮致厲翳之
爲訾迺布潔而躬疏兮敢競誇夫姣美擇丹瑣之瑤華兮
帶芙蓉以爲裳君獨奏爾瑟琴兮我更抒其文章握維佩
之陸離兮得假馱座之明光畏景炎之迫君兮進廣蔭於
蒼蒼怨葦蕤之無所陳兮鼓寒飈而傍皇羌甯愛其零露
分將揖天闕之琳琅噫夫獲庇於一周兮懷嬋娟之永也
固審夫孤榦之不揚兮愬而爲此穎也迨神化之不可究

兮俯旨茗之在卽先苒染而攄茶兮望山川之遐蹤余第
矯其能貞兮傷此心之所同

感役賦

假永日以舒眺遺軫結之沈懷覽周原之接肝循節物之
孔偕柔條鬱以成林薄卉腓而靡涯感候蟲之異喙寓時
鳥之呼儕嗟余躬之久役失流景之徘徊瞻元燕之來賓
見汀葭之萌秀迺羣類之已周又騰騰而改茂企歲星之
復旋逾四序而迭奏何征人之永違若浮梗之忘舊嗟豈
舊之敢忘兮亦迢迢而不舍邇雲螭之前驅兮旣吝藏而
莫予假層陰欲阻予之轡兮薄霧騰於中夜勉忼慨而將
前兮又依韋而相謝彼鳩草之在原兮羽翼當之而悴傷
繁鳥懼懼其咎兮爲斷駕於高驤良朋哀其汲汲兮設醴

酒而饋瓊漿展我情之固齋兮悲不忍於嚴霜擘飄袂以
下視歷寒炎而改色愁爛熳而流長恨崔隕而山積惟幽
怨之削肌况鬱思其銷骨思百折而莫窮意萬轉而能折
機樽遠而不御瑤琴毀而孰調昵親好於逆旅就執鞭以
爲僚實隱憂之中蕩髮蓬葆而已焦攬明鏡之末光驚眉
睫之下撓朝幽并之曠墟夕秦邱之元壤迨奔皖而跨豫
對江皋之宿莽彼土矯而情殊亦謹疾之無黨束孱躬而
言寄恐域阱之迷惘欲毀方而瓦趨又詆挫而見搶搏九
天以不下遂飾繩而措網恆抱景而孤遊意蕭颯而悒悒
誓渡湘以遠歸閉閨闕以自廣緬在昔之明哲莫不瘝心

於此離矧余情之枯槁徑晦迹而絕羈倚結聆而警感慘
玉珮而嚶咿塞薜蘿以蓄慮聊宣列於繁辭

蔡浣霞太守煙雨倚樓圖賦

并序

浣霞先生清選雅望著於中朝官禮曹十九年出爲延平太守有懷故鄉湖山之勝作煙雨倚樓圖予賦之以申其意辭曰

初霞頽兮絢越江之千里舉回波兮杜若綴浮岑兮文梓攬絳裾兮朔遊鼓蘭橈兮西汜雲旗眇兮雜岫寒芳日漾兮落花紫瞻層闕兮蒼蒼荃獨懷兮美子綠鳳兮始升赤虹兮在庭瑤闔兮周匝碧樹兮琤琤隱薜蘿而頻眠悵曉霧之乍明感斷緒之縈迴若重闔之旣扃魚何勞而逐鬢鴻何慕而栖汀於是眺故嶼之靡窮眷修途之易阻憶剡

溪以碗礧企桐廬以容與愁嬋娟之未達躡招搖以命汝
倚長劍兮海濱葺荷蓋兮江之湄秋風兮瀾瀾夏而來兮
偃而逝君心盪而不懌兮顧何須於雲之際闢丹牖兮百
重託芳鶯兮終契爽籟起兮神飄幽陰濛兮情閉贈明珠
以置懷蹇蹇待乎朝霽若乃綴辛夷疏石蘭坐綺閣猶雕
欄十步五步惟聞霜端怵怵歸夢烟波夜寒思天涯之峻
軌審知音之良難歌曰湖光濫兮中欲渡歡邂逅兮與君
遇蓼花紅兮君所居枕蕙楊兮守予素芳草豈復遠人兮
漑漑溥溥之秋露宵駕驛車以下上兮勿徒懷乎故宇結桂
軫以絕遊兮展蜺帶以延伫亂曰煙淼淼兮雨浪浪樓中

人兮不可忘羌絕世而獨立兮余跂領於瀟湘

玉鸚鵡杯賦并序

周君鑑湖觴余於曲室旣耐出其所藏鸚鵡杯曰此器潔而有容文而克粹庶可以比君子之德乎子其爲我賦之
賦曰

伊寶盃之焯爍體鼂采之奇英孕稷翼之崇嶽曜沂水之
迴陁守純璞於永禩邁良工而始瑩落重重之石蘂飛霅
霅之寒瓊爾乃虛中受剡因材騁巧取範流霞棲形隴鳥
翼斜舒而不欹殊抗舉而縈繞炯晃發乎內彩璘玢涵於
外藻澹春花兮若浮凝晚霜兮逾重軼槐里之碧尊欺扶
桑之銀甕瑕久琢而成文器雖珍而適用旣蘊物以彌深

亦傾懷而能縱爰不脛而遐邁乃遄登於玳筵沃九華之
妙醞冠百列之嘉籩名姝捧而袖綠勝客進而衣斑目眴
迷而乍轉意矜持而不前學黃流之潤色挹元醴之清妍
堯一酬而再酢悅禮義之我先彼誼呶而噓噴亦斂辭以
畏讐至若珠露依苔弓月入牖襜接良儕坐延詞友玉琴
兮橫徽翠管兮解綬秘笈兮可探情譚兮徐剖於是卻飛
雲之疊揮鳳足之占欣此杯之獨御引芳醕而爭受氣氤
氲以中人光燦爚以在手湛秋蘭兮香始升綰同心兮歲
月久藉昭質之無虧銘眷言之良厚亦臭味之永契兮豈
瓊華之鮮偶彼其揚光上國馳聲格都題延壽於金闕陳

常滿於瑤圖纘以龍文之錦承以絳銑之酎醕漢主而仙
至宴魏使而禮殊蓋運會之有俟固韞匱於厥初弛芳情
於斯辰委君佩兮未遠假琬液以託素庶春波之相款苟
一酌之莫酬兮思偃側以荏苒結惠纓於千里兮朱顏酡
而帶緩疏匣閉以曠時兮願美子之繾綣乃知夫容之滿
室兮芬不足以爲之盥也

倉山月話圖賦

爲袁蘭邨大令作

青溪舊宇徵君小山鍾乳濯徑雲衣繞關裡柏廣蔭花藥
迴環劉公之所經始沈侯之所遊盤聞幔亭之仙樂悵駕
崔而未還乃有蘭成逸韻山陽勝侶篁岫朝款蘿陰晚伫
散髮巖阿漣巾幽渚麗藻連觴清言薦塵副濠梁之雅契
傲滄洲之客主情醺醺兮不遑神淼淼兮先舉金波搖漾
滌其素襟空碧無際忽見遠岑延以綺榭鏘然玉琴子有
流輝我無遐心徙倚兮庭樾飄飄兮桂權鏡闌兮明瑟泳
鱗兮騰趯俯落花之在茵仰閒雲之出嶠忘修夜之已闌
息羣言於獨妙彼達士之拔俗固人事之可遺乃華曜之

易買念昔游之莫追光荏苒兮元珠抱曠邈兮素絲裏眞
人於天際揮豪翰兮永思歌日偃佺誰與期松子非吾友
芝朮貴談討金石保永久秋風颯兮秋月涼企江國兮心
難忘隔千里兮共此夕吐蘭緒兮舉扶桑

古藤賦 并序

東坡自嶺南歸寄居毘陵顧塘橋孫氏宅卽余家四世寓
廬也其東楹有紫藤一株傳爲先生手植榦大十圍夭矯
如卧虬層蔓飛糝蔭庭院百武蓋余猶及倚翫其下至嘉
慶乙亥厥根朽蠹遂俱傾落所存僅纖條大不盈握而生
氣猶茂迄今十餘年亦已蓊鬱檐杪本枝徑尺矣自宋至
今幾七百載膏脈未絕爲世珍異洵名德之所憑有神物
呵護之也庭有嘉樹古人識無忘焉況此藤之奇古託於
昔賢之手澤又復爲吾家之故物者耶余雖不敏輒爲賦
之其辭曰

爰有貞卉崔錯淩虛春條旣擢夏蕤以舒蘊兩儀之菁采
緜千禩之榮苓非喬松之是託倚磐石而不渝爾其逸幹
輪囷孤槎蟠鬱體同青銑色欺蒼玉風梢旣引霜皮暗膩
擬潛螭之偃蹇類尺蠖之蟬蛸忽擎攫而欲舉又宛渾而
自伏雨雪助其豐翳曦陽斂其堅樸若夫紫萼初吐絳蘼
始繁亭亭高榭猗猗曲欄明霞朝覆珠露夕團羨濃芬之
菴藹耀舊影之叢駢密葉舉以成幄柔絲纈而爲藩映新
碧於綺疏舞落英於玳筵惜芳華兮易逝忽荏苒兮歲年
閱榮寂兮旣久挺茂質兮莫攀產不同於剡溪幸永辭於
剪伐賴君子之末光比甘棠之遺烈謝絕澗之馭蔓殊窮

崖之萌茁迺委蛇於連館保蒼蔚之清樾維南陬之雅郡
有通德之故閭戀桐鄉之惠愛師季彥之僑居翫佳植於
名賢時徙倚於廣除或移談而就講亦假蔭而陳書泊余
身而四葉又垂穎兮百載嗟本實之先撥喜紛紜之未改
念人事之代嬗知化機之是宰何獨鍾於茲榦振芳菲於
硯礫物雖微而有值澤雖遠而不忘彼藟木之多壽藉明
德以克彰感孤根之荏弱含鬻秀兮中藏耿獨立之是懼
兮恐隕墜於繁霜何所憑以滋且永兮庶仰承夫餘慶撫
庭柯而太息兮展時序以彷徨

萬善花室文藁卷一終